

NAQQIUT

Inatsisissatut siunnersuut 1.august 2012-imeersoq taarserpaa

Meeqqanut suli atualinngitsunut perorsaanikkut inerikkiartuutaasunik ulluunerani neqeroorutit pillugit Inatsisartut inatsisissaattut siunnersuut

(Ilinniartitaanermut, Ilisimatusarnermut Nunanullu Avannarlernut Suleqateqarnermut Naalakkersuisoq)

Saqqummiussissut**Siullermeerneqarnera**

Naalakkersuisut sinnerlugit meeqqanut suli atualinngitsunut perorsaanikkut inerikkiartuutaasunik ulluunerani neqeroorutit pillugit Inatsisartut inatsisissaattut siunnersuut saqqummiutissavara.

Siunnersuut Naalakkersuisut Meeqqanut Inuusuttunullu Periusissiaq pillugu nalunaarutaannut ilasutitut suliarineqarpoq, taamatullu Naalakkersuisut Ilinniartitsinermit periusissiaq pillugu nalunaarutaat aallaaviulluni. Aammattaaq siunnersuut Naalakkersuisooqatigiit isumaqatigiissutaanni, kiisalu Naalagaaffiit Peqatigiit meeqqat pillugit isumaqatigiissutaanni politikikkut pingaarnersutigit anguniakkatut oqariartuutaasunut attuumassuteqarpoq. Tamatuma saniatigit siunnersuutip anguniarpaa november 2011-mi kommunini Namminersorlutillu Oqartussani sulisunit peqataaffigineqartumik isumasioqatigiinnermit isummersuutit piviusungortinnissaat. Taamani ilaatigit suliat akimorlugit suleqatigiinnik pilersitsinissap pingaarutaa oqallisigineqarpoq. Ilutigisaanik siunnersuut ilinniartitsinikkut suliniutit ilaattut isigineqassaaq, tassami meeqqanut suli atualinngitsunut tunngasut ilinniartitsinerup aaqqissugaanerata ilaattut isigineqarput. Tassunga tunngatillugu takorluugaq tassaavoq, meeqqat tamarmik oqaatsitigit, inooqatigiissutsikkut misigissutsitigullu inerikkiartornissaat ilikkariartornissaallu qularnaarneqassasoq, atualernissamut naleqqiullugu pissusissamisuuginartumik pitsaasumillu tunngaviliisuusumik. Tassunga atatillugu siunnersuutip meeqqanut suli atualinngitsunut tunngasut ilinniartitsinerup aaqqissuussinerup sinneranut ataqatigiinnerat pitsanngorsassavaa, ilaatigit meeqqat mappiisa pilersinnerisigit.

Ilutigisaanik siunnersuumi qitiulluinnarpoq, meeqqanut immikkut pisariaqartitsisunut naleqqiullugu siusissumik iliuseqarnissap erseqqissarnissaa, tamannalu ilaatigit pissaaq tamanut atuuttumik meeqqat ineriartornermini killiffiannik misissuineritigit. Innarluuteqarnerup piffissami sivisunerusumi kingusissussukkullu sunniuteqarsinnaanera allatulluunniit pisinnaassutsip annikillineri siusissumik iliuseqarnikkut, annikillisissinneqarsinnaapput. Tassunga tunngatillugu pisariaqartutut isigineqarpoq meeqqat immikkut pisariaqartitsisut sapinngisamik siusinnerpaamik paasinissaat, tamannalu suliat assigiinngitsut akimorlugit pisariaqarpoq. Siusissumik iliuseqarnerup inunnut ataasiakkaanut inuiaqatigiinnilu aningaasaqarnikkut iluaqutissartai annikitsuinnaanngillat, tamanami kigusinnersukkut pisunut tamanut sunniuttarpoq. Tamatuma saniatigit siunnersuutip siunertaraa meeqqanut suli atualinngitsunut suliniutit eqaannerusumik aaqqissuussinnaanissaat, qitiusumi meeqqanut inuusuttunullu tunngasutigit ingerlataqartut suliniutinik aallartitsinissamut naleqqiullugu piginneqataasutut misiginissaasa qularnaarnissaannut naleqqiullugu.

Pineqartut saniatigut siunnersuutip aammattaaq siunertaraa Inatsisartut peqqussutaata atuuttup atutilernerata kingorna allangortittariaqartututut paasineqartut aqqiviginissaat.

Taama oqaaseqarlunga siunnersuut Inatsisartunut oqallisigissanngortippara.